

رغم التعب

رغم التعب والتناقض منزلك عالي
لو كنت في خطوتك تكثر تعاريجك
عنيدي لكن عنادك حيل يحلالي
ولو كان للعند تاج اعلنت تتويجك
لكن ترفق وشوف وجيهه عذالي
تفرح،، تأيد صدودك لي وتحجيجك
يكفي تشوف بعيونك ثوبي البالي
اللي تمزق تحت قسوة كرابيجك
حزين رددت للاحزان موالي
وانت اتغني فرح واسمع اهازيجك
لازلت احبك ولكن وعد يالغالي
لا بد،، اوقف دعاباتك وتهريجك
وان كنت مهر ولا روضك خيالي
جيت وعلى جثتي عسفك وتسريجك

متعب التركيبي

بسافر !!

يقول المحبه ويش لو غابوا الاحباب؟
اقول الجسم من غير نبض وشعور وروح
يقول النهار يغيب! وش موقفك لا غاب؟
اقول ان رضيت اسكت يصير السكوت البوح
يقول السترسمعه وذكر وفعل وثياب!
اقول المحب من الوله والسهر مفضوح
يقول انت قايل لي بسافر بدون عتاب؟!
اقول ايه! قبل اضيع في وجهك المملوح!
قبل تبدي الاعجاب وابدالك الاعجاب
قبل تاخذ احساسني وقلبي عبث وتروح
قبل ينفتح لك بين عوج الحنايا باب
ويبقى على طاريك طول العمر مفتوح
قبل لاتوهق فيك بالصادق الكذاب
قبل لاتحطم منك يالمخطي المسموح
قبل لاتعلقني وترحل بدون اسباب
قبل لاتعلمني اعد السنين جروح!
قبل يتبعك وانت تمادى جفا وغياب
قصيدي ودمع عيوني وصوتي المبحوح!
ياليت الزمن يرجع واحسب لجفاك حساب
وعد ماتعلق فيك وانساك قبل تروح

محمد جارالله السهلي